

Rau Ite Inim Ru To Paulus Imbooda Ila To Timoti 2 Timoti—2 Timothy

¹ You Paulus. Maaron itaghon tau lolo ve ighur ghou nanim mbanjoona to Yesu Krisi. Leso navotia saveen mbuaan toni pa tamtoghon, ve napatoot di pa nepoon poia to ye ighaze igham padi. Nepoon tonowen, tamtoghon to tineep tunja ila to Yesu Krisi, to pale tighami. ² O natug Timoti, you lolog payom kat, tauto nambood rau tonene ilat tiom. *Mban 16:1+; 1Tim 1:2*

Poia to Tamaan Maaron ve Tiina toit Yesu Krisi iza tiom, ve lolodi isamin ghom ve tiuul ghom, ve tingin ghom uneep pooi toman lolom luuma. Onoon.

Paulus ipariaan Timoti pa iyoon ariana ve ivotia varu poia

³ You nambesmbes pa Maaron ve nataghon ngar to nawatagi ila lolog naghaze nene ingalaan ila ye mata, inimale muun nditimbug tighamghami. Ve mbon ve ndag, matag ingalngal ghom, ve naghurghur ghom ila sunuun tiou, ve napapait Maaron toman lolog poia pa ngar poia to yom ughamghami. *Mban 22:3; Pil 3:5+*

⁴ You matag ingal imuul ila pa sawa to ituru tawapulun ghiit, ve naghita tanjiz tiom toman matam suru. Tauto nanazuuv ghom naghaze naghita ghom rita, ghoru igham ghou lolog poia le poia kat.

⁵ Ve naghama ngar paam pa gabuam to ughur ila to Krisi toman lolom. You nawatag: Ghurla tiom,

nene mbeb tau, inimale timbum liva Lois ve tinam Yunis ghurla todi. *2Tim 3:15*

⁶ Tauto naghaze napamundigin ghom muul. Leso ngar ve tapiri to Maaron ireii payom, ineep sorok sob, ve ugham uraata le ivot inim tiina, inimale tamtoghon tivib yab, ve ighan tiina iza. Maaron igham tapiri ve ngar tonanan payom, indeej sawa to you naghur nimag izala poghom.

1Tim 4:14

⁷ Yom uwatag: Avuvu to Maaron igham pait ne, ye irau igham ghiit tamatughez maau. Ye ipapalot ghiit. Leso tanjin tauud pooi, tayoon ariana, ve lolood pa tamtoghon ve tagham poian di. *Ro 8:15*

⁸ Onoon, aazne tighur ghou naneep ila ruum to yabyabuuj lolo pasa, nataghon Krisi. Eemoghon ngar to tigham payou ne, mayam pani malep. Ve mayam pa votiaan varu poia to Tiina toit malep. Yom irau upariaan saveej toni, lesa tamtoghon tighur ila toni. Ve ugham tapirim ila to Maaron, ve uyoon ariana ve umbaad patañani pa varu poia unumale you. *Mk 8:38; Ro 1:16; 2Tim 2:3, 4:5*

⁹ Maaron igham mulin ghiit, ve ipoi ghiit tanim le, lesa tataghon ngar patabuanj. Ve iit tagham ngar poia eta, to ye ipoi ghiit pani ne maau. Ye itaghon tau lolo, ve poia toni. Muuj kat, sawa to mbeb eta ivot sone, ye mata injal pataghaan ighaze igham poian iit tamtoghon to taneep tunja ila to Krisi. *Ro 8:28; Ep 1:4, 2:8+; 1Tes 4:7*

¹⁰ Ve aazne, Volaana toit Yesu Krisi izi inim taan, ve ipatoon poia to Maaron tonowen ivot ighazoon, ve ipasob mateej tapiri wa. Varu poia ipatoon ghiit pa ataam to tagham nepoon poia ila to Maaron ve

taneep mataad iyaryaar le alok. *1Kor 15:54+; Hib 2:14+*

¹¹ Maaron ighur ghou nanim mbanjoona toni, leso navotia varu poia tonene pa tamtoghon ve napatoot di pani. *Mbanj 9:15; Ga 1:15+; 1Tim 2:7*

¹² Pughu tonene to aazne nambaad patañani naol. Eemoghon namatughez maau, ve mayag maau. Pasa, you nawatag Ngeu to naghur ila toni, ve naghur ila kat naghaze: Varu poia to ye ighuri inim nimag, ye tau pale ingin poiani le irau sawa to imuul inim.* *Ep 3:1+; 1Pe 4:19*

¹³ O Timoti, saveen poia to uloonja ila you avog, nene ipatoon ghom pa sa saveen to yom irau upatoot tamtoghon pani, leso ghurla todi iyaryaan ve lupuuñ to Krisi ilaan poia. Tovenen matam kisini ve utaghoni. Ve uneep tunja ila to Krisi, ve ukis ghurla tiom ariana, toman ngar to lolood pa Maaron ve tamtoghon. *2Tim 3:14+; Hib 10:23*

¹⁴ Varu poia to ilat nimam, nene mbeb tau. Tovenen matam pani ve ungin poiani. Avuvu Patabuan to inepneep ila lolood ne, pale ipalot ghom, leso ugham tovene. *1Tim 6:20*

¹⁵ Yom uwatag: Nditaad to taan suruvu to Asia, tisob tipul muridi payout wa. Ndiran tonowen, todi ru, nene Pigelus ve Ermogenes. ¹⁶⁻¹⁷ Eemoghon Onesiporus toman yes to tinepneep tomani ila ruum toni, Maaron pale lolo isamin di ve iuul di. Onoon, aazne you nanepneep ila ruum to yabyabuun lolo, ve tikau nimag ve

* **1:12:** Ataam ite to tator saveen waaro tonene, nene vene: 'naghur ila kat tovene: Ye pale ingin poian ghou le irau sawa to imuul inim. Pasa, you naghur taug ila nima wa.'

agheg pa sen. Eemoghon Onesiporus imatughez maau, ve maya payou maau. Sawa to inim Rom, ye ikalkaal ghou le inim ivot tiou. Ve sawa naol, inimnim ingigig ghou, ve ipapalot ghou, ve iuluul ghou. *Mt 25:36; 2Tim 4:16; Hib 13:3*

¹⁸Ve yom uwatag: Muuñ, ye iuul ghou kat izi ndug Epesus. Tauto naghaze Mbonj Muri, Maaron pale lolo isamini ve igham mulini.

2

Timoti irau iyoona ariana pa badoon patanani

¹Tovenen natug Timoti, matam ingal poia to Maaron to taghami ila to Yesu Krisi. Leso ipalot ghom ve uyoona ariana. ²Ve saveen isob to nasavia ila ival tiina matadi ve yom uloona, usakia ila pa tamtoghon pida to yom ughita di ughaze yes tiraua, ve unumeer di ughaze yes pale tinidi imbees pa uraat to Maaron. Leso anadi tipatoot tamtoghon pida pa saveen tonenen, ve uraat to varu poia iseenga itaghoni gha ila. *Tit 1:5*

³Uraat to votiaan Krisi varu, ye le patanani. Tovenen yom irau unum toman ghei ve itina tambaad patanani tonene. Leso unum ndaaba poia eez to Yesu Krisi. *2Tim 1:8, 4:5*

⁴Yom uwatag: Yes ndaaba matadi ilala pa uraat ite paam inimale tamtoghon pida ne maau. Yes tineep ila uraat to malmal moghon. Leso tigham daba todi lolodi poia pa uraat todi. Yom irau ugham tovene paam. ⁵Tamtoghon to ighaze ilaan pa landoon tiina, ye irau itaghon tutuun to landoon, ghoru irau igham atia to yes to tilaan le tilib.

Ve ighaze itaghon tutuunj to landoonj maau, nene irau ighami maau. *1Kor 9:25+*

⁶ Ighaze sawa to taitainj ivot, nene irau tighur ngeu to igham uraat tiina pa vazogiinj aniin ne le ndamo muunj, ghoru poia. *1Kor 9:7,10*

⁷ Saveenj palelaanj tiou naol tonene, ighaze ugham njar padi pooi, nene pale Maaron tau ipaghazonjan ghom pa pughu. Leso uwatag sa njar to yom irau utaghoni.

⁸⁻⁹ Matam ingal Yesu Krisi irau sawa isob. Ye ivot ila sinj to kinik David. Ve imaat, ve Maaron ipamundigini pa mateenj. You navovotia varu poia tonene pa tamtoghon, tauto nambadbaad patanani, ve aazne naneep ila ruum to yabyabuunj lolo ve tikau ghou pa sen inimale you ngeu samia. Eemoghon Maaron aliija, yes irau tipoon ataam pani maau. *Ro 1:3; 1Kor 15:4; Pil 1:12+; Kol 4:3*

¹⁰ Tauto nayoona ariana pa badoonj patanani naol to igham ghou ne. Pasa, you naghaze nauul yes to Maaron isia di tinim le. Leso tineep tunja ila to Yesu Krisi, ve igham mulin di, ve tineep toman Maaron ila njaruba lolo itaghoni taghoni gha ila. *Kol 1:24*

¹¹ Saveenj to naghaze nasavia, nene onoon moghon. Irau taghur ila kat:

“Ighaze iit talup toman Krisi pa mateenj toni, nene pale taneep mataad iyaryaar tomani.

¹² Ve ighaze tayoona ariana ve tambaad patanani pa ye iza, nene pale itinja Krisi tagham pooz. *Ro 8:17; 1Pe 4:13*

Eemoghon ighaze tapul muriid pani ve tapesamun iza, ye pale ipul muri pait, ve

ipesamun izaad paam.

Mt 10:33

- ¹³ Sawa pida, iit tataghon saveen mbuaan toit toman Krisi maau. Emoghon ye, ghoru itaghon saveen mbuaan toni irau sawa isob. Pasa, ngar toni ineep pataghaan to muun ve inim. Irau itortoora maau.” *Nam 23:19; Ro 3:3+; 1Kor 1:9*

Timoti irau inim uraata poia to Maaron

¹⁴ Saveen tiou tonene, you naghaze yom up-amundigin tamtoghon ngar todi pani irau sawa isob, lesu matadi kisini. Ve avom iyaryaan padi ila Maaron mata, lesu tiwazoran di pa saveen soroksorok sob. Pasa, saveen tovene irau iuul ghiit rita maau. Nene iwaghamun yes to tilonloona. *1Tim 6:4; Tit 3:9*

¹⁵ Uzuaria ghom le uraat tiom isob denja moghon ila Maaron mata. Ve uvotia katin saveen onoon pa tamtoghon itaghon ngar to Maaron. Lesu mayam ila ye mata sob, ve ighita ghom ighaze yom uraata toni poia eez. ¹⁶⁻¹⁷ Saveen soroksorok to taan to tamtoghon avodi burburia pani, yom uneep saganu pani. Pasa, saveen tovene pale ipaghau tamtoghon pa ataam to Maaron, ve tila tila le tisami kat. Nene inimale moroghoon samia to ivot inim tiina, ve iwaghamun tamtoghon le tisami. Ndiran ru to tisasavia saveen tovene, nene Imeneus ve Piletus. *1Tim 1:4,20, 4:7; Tit 1:14*

¹⁸ Yesuru tipul ataam to saveen onoon wa. Pasa, tivovotia saveen kaarom pa tamtoghon tighaze mundigiin to yes mateena, nene ivot wa. Ve muri, mundigiin ite paam muul maau. Saveen todi

tonowen iwaghamun tamtoghon pida ghurla todi wa.

1Kor 15:12; 2Tes 2:2+

¹⁹ Eemoghon Maaron ipayoon lupuun toni izala gungun ariana eez, ve imbood saveen waaro ru izala. Eez isaav tovene: “Maaron iwatag tamtoghon toni.” Ve ite isaav ighaze: “Tamtoghon tisob to tivotia Yesu iza tighaze ye Tiina todi, nene yes irau tipul muridi pa ngar samia, ve tineep sagan pani.” Saveen ru tonene tinim ghilaloon pa tamtoghon to Maaron.

Yo 10:14,27

²⁰ Ruum tiina, nene mbeb naol naol tinimale uur ve oon tineep iloon ila. Pida, tigharaat di pa gol ve silva. Ve pida, tigharaat di pa taan ma ai. Pida, to uraat tintina. Ve pida, to uraat soroksorok.

Ro 9:21; 1Kor 3:12+

²¹ Iit tamtoghon tovene paam. Ighaze ngeu eta ipul ngar samia ineep, ve igharaat tau lesu ingalaan ila Maaron mata, ye pale inim uur patabuan to poia pa ghamuun uraat tintina to Maaron. Ye pale irau iuul Tiina toni, ve igham uraat popoia to naol ne.

2Tim 3:17

Ngar to mbesoona poia to Maaron itagioni

²² Tovenen yom uneep sagan pa ngar samia naol to ndipain tighamgham di. Ve yamna tamtoghon tisob to tisunsun pa Maaron toman lolodi ngalaana, azuaria gham pa aneep denjamim ila Maaron mata, ve aghur ila toni ariana, ve lolomim pa tamtoghon ve agham poian di, ve alup lolomim inim ee moghon, ve ataghon ngar luuma.

1Tim 1:5, 6:11; Hib 12:14

²³ Eemoghon yes to tikankaan pa Maaron, ve tiyouyou avodi, ve tiwazoran di pa saveen soroksorok, yom ula toman di pa saveen todi

malep. Pasa, yom uwatag: Saveeņ tovene, nene ipamundigin njoņaņ ve malmal moghon. *Tit 3:9*

²⁴ Tamtoghon to ighaze inim mbesooņa to Maaron, nene irau ate yabyab soroksorok ve iņoņooņ ne maau. Ye irau igham poian tamtoghon tisob, ve ipatooņ ngar luuma padi. Ve ye irau le ngar pa uraat to patoņaņ tamtoghon pa Maaron aliņa. Ighaze tamtoghon tigham samini, nene irau iņooņ maau. Ye irau itatan ate, ve imbaada moghon. *1Tim 3:2+; Tit 1:7+*

²⁵ Ve ighaze tamtoghon pida tizoor aliņa, ye irau ipasalunģan di toman saveeņ luuma. Pasa ighaze igham tovene, nene pale inim ataam pa Maaron igham di titoor ngar todi, ve ngar todi ivot ve tighazooņ pa saveeņ onoon. *Ga 6:1; 2Tim 4:2*

²⁶ Leso tighilaaļ, ve tipas taudi pa liis to Ngeu Samia. Pasa, ye to iliis di pa liis toni, ve ighamgham pooz padi leso titaghon ngar toni.

3

Muri, tamtoghon pale titaghon ngar samia

¹ Timoti, you naghaze yom uwatag kat tovene: Muri, pataņani naol pale tivot. *1Tim 4:1; 2Pe 3:3*

² Pasa, tamtoghon pale lolodi pa taudi moghon, ve tighur lolodi kat pa yaam. Ve tipapait taudi izadi tighaze tilib pa nditadi pida. Ve tipipiyaav saveeņ samsamia pa nditadi, ve tizorzoor nditamandi ve nditinandi aliņadi. Ngar popoia to Maaron ve tamtoghon tighamgham padi ne, yes pale tighita inimale mbeb sorok, ve lolodi imaghmaagh pani. Ve ledi roroniņ pa Maaron maau. Pale tivelegi inimale mbeb sorok. *Ro 1:29+; Jud 18*

³ Ve yes pale lolodi pa tonvetaz todi paam maau. Ighaze atedi yabyab, nene irau atedi izi rikia maau. Pale tikis malmaliinj todi ariana. Ve yes pale tingal saveenj naol pa nditadi. Ve irau tingin taudi pooi maau. Ngar todi, nene inimale mbeb sagsag. Pasa, lolodi isamin tamtoghon rita maau, ve tiwaghamun di sorok. Yes pale tighur koi pa ngar popoia to naol ne, ⁴ ve tighur nditadi tila koiadi nimadi. Ve ledi gabizoon maau. Tila pa naghodi moghon. Ve tipait taudi izadi. Tovenen yes pale lolodi pa Maaron maau. Lolodi pa mbeb to ulidi moghon. ⁵ Yes pale tiparim taudi tighaze titaghon Maaron ngar toni. Eemoghon ngar to tighami, nene pale ipatoon di ighaze yes tiwatag Maaron tapiri rita maau. Ndiran tovene, yom uneeep saganu padi. *Mt 7:21; Tit 1:16*

⁶ Tamtoghon todi pida pale titoova pa tiloon tila ruum to yes ndiliva to ledi ghilaloon maau, ve tigham saveenj ngoreenj padi leso titaghon di pa ngar todi. Ndiliva tonowen tighilaal tighaze yes tigham sosor katindi, ve lolodi ipatanan pani. Eemoghon irau tipul ngar todi tonowen ne maau. Pasa sawa isob, ngar samsamia naol naol tipa-pazaagh di. ⁷ Yes ndiliva tovene, lolodi tighaze le tilonloon saveenj to tamtoghon tipatoot di pani. Eemoghon ngar todi irau ivot kat pa saveenj onoon to Maaron ne maau. *Tit 1:11*

⁸ Ndiran kaaromna tonowen tizorzoor saveenj onoon inimale muun Yanes yesuru Yamberes

tizoor Mose.*

Ngeu Samia ighamun ngar todi kat, ve tighamgham kaarom pa ghurla todi. Tauto Maaron ipul muri padi wa. ⁹ Eemoghon uraat todi pale irau ighur kat maau. Pasa, ngar to muun ivot pa Yanes ve Yamberes, nene pale ivot padi paam. Pale titoova le maau, ve ival tiina tighilaal di tighaze ledi ngar maau. Ngar todi inimale borouja.

Paulus ipalot Timoti muul

¹⁰⁻¹¹ O Timoti, yom unum toman ghou, ve sawa naol ituru talaghlaagh. Tovenen ngar to nasasavia pa tamtoghon, laghoon tiou, mbeb to nazuarria ghou pani, ghurla tiou, gabuag to natatan taug ve nayoon ariana pa badoon patanani, ve ngar tiou to lolog pa tamtoghon ve naghhamgham poian di, nene taum ughita di wa. Ve patanani naol to tamtoghon tighurghur di payou, nene paam yom uwatag di. Muun, tigham samin ghou kat izi ndug Antiok, Ikonium, ve Listara. Eemoghon Maaron ipas ghou navot pa patanani tiou tisob tonowen.

Mbo 34:19; Mban 13:50, 14:5,6,19

¹² Onoon kat, ndiran tisob to tineep tunja ila to Yesu Kresi ve titaghon katin Maaron ngar toni, tamtoghon pale tighur patanani padi. *Yo 15:18+; Mban 14:22; 1Tes 3:3*

¹³ Ve ndiran samsamiadi ve ndiran kaaromja to tipaghau tamtoghon pa ataam to Maaron, nene pale tinoknok ghamuun ngar todi samia tonowen

* **3:8:** Ughita Igham (Kisim Bek) 7:11+. Kamos munjinadi pida to yes Yuda tisaav tovene: Yes mura to Isip to muun yesja Mose tiwatovan tapiridi, tamtoghon todi ru izadi Yanes ve Yamberes.

ila ila le inim tiina kat. Tovenen kaarom todi pale iweu tamtoghon tiyel pa ataam to Maaron. Ve taudi tiyel pani paam. Pasa, tighur ila ngar kaarom.

¹⁴ Eemoghon yom irau matam kisin saveen onoon to ulooᅇa ve ughur ila, ve utaghoni. Pasa, yei to nipatoot ghom pa saveen tonenen, yom uwatag ghei wa. *2Tim 2:2*

¹⁵ Sawa to pain ghom ve inim, utub toman Maaron aliᅇa patabuanᅇ to timbooda. Saveen tonowen irau ipatooᅇ ghom pa Maaron ngar toni, lesu ughazooᅇ kat pa ataam to ye igham mulin ghiit pani. Ataam tonowen, nene vene: Ighaze taghur ila to Yesu Krisi ve taneep tunᅇa ila toni, nene pale taneep pooi. *Mbo 119:105,130*

¹⁶ Maaron aliᅇa isob to timbooda, nene Maaron Avuvu ipamundigin tamtoghon, tauto timbooda. Saveen toni iuluul ghiit pa tapasalunᅇan tamtoghon ve tapatoot di pa Maaron ngar toni. Lesu tiwatag saveen onoon, ve tighilaal sosor todi ve tipuli, ve titaghon ngar deᅇia moghon. *Ro 15:4; 2Pe 1:20+*

¹⁷ Tovenen ighaze Maaron tamtoghon toni eta iwatag katin saveen toni, ye pale iraua kat pa ghamuunᅇ uraat popoia to naol ne.

4

Paulus isaav ariana pa Timoti

¹ Muri pale Tiina toit Yesu Krisi imuul inim, ve ipatooᅇ pooz toni ivot ighazooᅇ, ve ingabiiz tamtoghon tisob ve ighur atia padi. Yes to tineeᅇ matadi iyaryaar, ve yes mateeᅇa paam. You

nasaav ariana payom ila yesuru Tama Maaron matadi naghaze: *Mbanj 10:42; 1Pe 4:5*

² Uvotia Maaron aliña pa tamtoghon irau sawa isob. Ighaze uneeḡ ila sawa poia ve tamtoghon lolodi pa tilooḡ ghom, ma uneeḡ ila sawa samia ve tiyasiil pa saveeḡ tiom, yom irau uyoon ariana pa badooḡ pataḡani ve upatoot di kat pa Maaron aliña. Uvotia saveeḡ kaarom ve ḡgar samia to tamtoghon ivot ighazooḡ, ve avom iyaryaḡ paḡi lesu tipuli. Ve upalot di pa titaghon Maaron ḡgar toni. *1Tim 4:13; 2Tim 2:25; Tit 2:15*

³ Pasa muri, sawa eta pale ivot, ghoru tamtoghon lolodi pa tilooḡ saveeḡ poia to itaghon Maaron ḡgar toni ne maau. Taliḡadi pale igham pa loḡaḡ saveeḡ soroksorok moghon. Tovenen yes pale tiyou ndiran kaaromḡa katindi tinim, ve tighur di tinim patoḡaḡ paḡi. Pasa, yes tiwatag: Ndiran tonowen pale tipul di titaghon taudi lolodi ve ḡgar todi. *1Tim 4:1*

⁴ Sawa tonenen ighaze ivot, tamtoghon pale tipoon taliḡadi pa saveeḡ onoon to Maaron ve tipul muridi pani, ve tighur taliḡadi pa vuvuaḡ soroksorok.

⁵ Eemoghon yom irau atem imaat, ve ugham ḡgar pooi irau sawa isob, ve uyoon ariana pa badooḡ pataḡani, ve uvotia varu poia pa yes to tighur ila sone. Tinim imbees pa uraat to Maaron ighuri ilat nimam, ve ugham uraata le anoḡa ivot. *2Tim 1:8, 2:3; 1Pe 1:13*

Paulus sawa toni inim igharau wa

⁶ Pasa, sawa to napul taan, nene inim igharau wa. Mala maau pale siḡ tiou imaliḡ inimale vaen to tilini izala watooḡrau pogho. *Pil 2:17*

⁷ You naparab ariana pa varu poia le nalib wa. You napariaan ghou ve rismoghon, ghero napa-sob landoon tiou tonene. Ve ghurla tiou, nene nakiskisi sone. *1Kor 9:24+; 1Tim 6:12; Hib 12:1*

⁸ Tovenen atia poia to yes to tiparab ariana le tilib, tauto isasaan ghou. Atia tonowen, nene vene: Sawa to Mbon Muri, Tiina toit to gabizoon toni denja moghon, ye pale ighita ghou ighaze you ngeu denjag. Ve you moghon maau. Tamtoghon tisob to lolodi pani, ve tighaze le tighita mulaan toni, nene ye pale igham ngar raraate moghon padi. *Yems 1:12; 1Pe 5:4; Syg 2:10*

Paulus ipasul Timoti ighaze ila ighita rikia

⁹ O Timoti, utoova pa unum rikia. ¹⁰ Pasa, mbeb to taan igham Demas mata, ve ipul ghou ve ighau ila pa ndug Tesalonika wa. Ve Kresenes, ye ila pa taan suruvu to Galesia, ve Titus ila pa taan suruvu to Dalmatia. *Kol 4:14; 1Yo 2:15*

¹¹ Ve Lukas enjeni, tauto yeru ninepneep. Tovenen naghaze ugham Markus, ve yamru anim. Pasa, ye irau iuul ghou kat pa uraat to Maaron. *Mban 15:37+; Kol 4:10,14*

¹² Tikikus, you nambaana ilat pa ndug Epesus wa.

¹³ Nonogiiņa tiou to moņeņaan, napuli ineep Karpus ruum toni izi ndug Troas. Sawa to ughaze unum, ghero matam ingali ve ughami inim. Ve ugham rau tiou tinim paam. Ve rau tiou to tigharaat di pa nğai uli, nene matam ingal di kat, ve ugham di tinim. Lolom imaagh padi malep.

¹⁴ Aleksander to ngeu to gharatoon mbeb pa mbaras ve ain, ye igham ngar samia to iwaghamun ghou kat. Ngar to igham payou, muri Maaron tau

pale iyati. ¹⁵ Tovenen matam imosmoos pooi pani. Pasa, ye izoor katin saveeņ tiei. *1Tim 1:20*

¹⁶ Sawa inim mata to tipayoon ghou pa navotia taug pa uraat tiou, tamtoghon eta iyoon murig ve ipariaaņ saveeņ tiou maau. Maau kat. Tisob tighau payou. Eemoghon you nasuņ Maaron naghaze mata kisin sosor todi tonowen ve iyati malep.

¹⁷ Onoon, you engengou. Eemoghon Maaron ineep toman ghou ve ipalot ghou. Tauto navotia katin varu poia pa yes to Yuda maau ne, ve tisob tilooņa. Sawa tonenen, naghaze pale namaat. Eemoghon maau. Maaron iuul ghou, ve ipas ghou navot ila laion avo. ¹⁸ Ve you naghur ila ariana naghaze ye pale igham mulin ghou pa ngar samsamia tisob to tamtoghon tighaze tigham di payou ne, ve mata payou pooi le igham ghou nala naneep tomani izi ndug toni sambam. *Mbo 121:7*

Ye iza tiina kat pa tapiri ve poia toni. Tovenen paitooņ toit inarua irau sawa isob. To aazne ve itaghoni taghoni gha ila. Onoon.

Paesiņ pida to Paulus

¹⁹ Ugham ndag poia tiou pa Prisila yesuru Akwila, ve Onesiporus toman yes to tineep tomani ila ruum toni paam. *Mbaņ 18:2+; 2Tim 1:16+*

²⁰ Erastus, you napuli ineep izi ndug Korin. Ve Tropimus, ye imorooņ ve napuli ineep izi Miletus. *Mbaņ 19:22, 20:4, 21:29*

²¹ Timoti, utoova pa unum rikia. Pasa, mala maau pale ndug isami ve yaunņa tiina ivot.

Eubulus, Pudes, Linus, ve Klaudia, toman toņvetaz to Krisi tisob to yeiņa ninepneep ne, yes tigham ndag poia todi payom.

²² Timoti, Tiina toit pale ineep toman ghom, ve poia toni iza to yam asob. Onoon.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Nov 2022 from source files dated 9 Oct 2020

c7a45d99-91a2-564f-9c55-d2efc8be7fae